



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : f Tir Yimyim

Instagram tiryimyim@aolima

YouTube tir yimyim TAPAK 8

CM Sangma-i Mawlyndep  
Community Center semzüksü

Sudan mitkari PM Hamdok  
tanaben anioktsü

VOL. XIX NO. 445 (ADOK 445) DIMAPUR TENTONÜ (MONDAY) YIMPOKSÜI (NOVEMBER) 22, 2021 ₹ 5.00

## Sarma aser Rio na Jorhat nung ajurutep



Deobarnü Assam CM, Sarma aser Nagaland CM, Rio na ajurutepba noksa nung angur.

**Guwahati, November 21, 2021 (Agencies):** Küm aika Assam-Nagaland arrtsü atema ken o tem adoker toktepa arur aser iba onük lemteptsü atema Deobarnü Assam Chief Minister Himanta Biswa Sarma aser Nagaland Chief Minister Neiphiu Rio na ajurutepogo.

"Tanü Jorhat nung MP Kamakhya Tasa den külemi Nagaland Chief Minister Neiphiu Rio den ajurutepba atema pelar. State ana tsüngda alemi nungi

tesentaktep tajung aliba akangshiteptsü jembitepogo. Onoki North East longjemtsü aser tashi aittsü atema inyaker" ta Assam CM Sarma-i metetdaksü.

Tesüiba küm ishika Assam-Nagaland arrtsülen mangatettep adoka aruogo aser tensa azüoktsü atema state ana tsüngda tenangzükteptem agia arur.

Assam aser Nagaland tsüngda mangatettep aika arrtsü aser ali atsünga agiba onüktem ajanga adokba liasü.

## NSCN (R)-i NNPGs sabang nungi pilar

**Dimapur, November 21, 2021 (TYO):** NNPGs tanishirtemi NSCN (R) sasep nung mepetmesü adokba nung tiyongtsüü aita inyakba atema tenüngsang agütsür, ajisüaka parnoki lennir kar tenüng menüktsuba magizüker, ta MIP (Ministry of Information & Publicity), NSCN/GPRN (Reformation)-i metetdaksü.

Iba jagi NSCN (R)-i NNPGs sabang nungi tesentaktep ajak pilar aser 'Separate Entity' ka ama aktimba osang metetdaksür ta MIP-i

sangdong ka nung ashi.

November 19, 2021 nü NSCN (R)-i ashiba ama lennir kari tashiyim aser temzüng alema inyakba ajanga onok balaka razüka ao. Onoki NSCN Yezabo aser Party discipline nung noktaker aser President, NSCN/GPRN (R) Ino Akato Chopi pusama nungiter, ta MIP-isa metetdaksü.

Maneni, November 19 nü sangdongba ama NSCN (R)-i India sorkar den 'Unilateral Ceasefire' aliba nenshia metetdaksür, ta parnokisa ashi.

## COVID-19 Nagaland: 10 dak putet & 5 taneptsü angu

**Kohima, November 21, 2021 (TYO):** Nagaland nung Deobarnü nisung 10 dak COVID-19 putet aser pungu taneptsü angu.

"Tanü Dimapur nung nisung 10 dak putet" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Taoba ghonda 24 tsüngda Dimapur nung COVID-19 agi shiranger nisung pungu taneptsü angu. Nisung 32,050 rongnungi 30,173 taneptsü nguogo aser ibaji taneptsü angur 94.14% lir" ta pai metetdaksü.

Tang nisung 126 anepaludar saka parnok 99 dakbo shirangba yimya kecha mali, ta Dr Kikon-isa

shisem.

"Honibar tashi nung nisung 723,707 nem COVID-19 vaccine indang dose 12,52,936 agütsüogo" ta State Immunization Officer, Dr Ritu Thurr-i ashi.

Vaccine agirtemji frontline workers 60,976, healthcare workers 15,999, arishi küm 45 ser tempur 205,113 aser arishi küm 18 nungi 44 tsüngda alir 441,619 lir, ta paisa ashi.

"Vaccine agirtem rongnungi nisung 529,229-i dose anaprong agiogo. Parnokji frontline workers 48,297, healthcare workers 13,475, arishi küm 45 ser tempur 168,623 aser arishi küm 18 nungi 44 tsüngda alir 298,834 lir" ta Dr Thurr-isa metetdaksü.

## K.T Sukhalu-i NE Education Conclave nung aden

**Kohima, November 21, 2021 (TYO):** Nagaland School Education Advisor K.T Sukhalu-i Guwahati nung amongba North-East Education Conclave nung denogo.

North-East Education Conclave ya November 20 aser 21 anogotem Assam Administrative Staff College, Guwahati nung ayonga among. Iba sentong ya Department of Education, Government of Assam aser Shankardev Education and Research Foundation Guwahati ajanga yaritepa ayongzük.

Advisor K.T Sukhalu den

külemi Kevileno Angami, Special Secretary to the Government of Nagaland School Education & SCERT, Tamsunaro Aier, State Mission Director Samagra Shiksha, Shanavas C. IAS, Principal Director School Education aser Dr. Kevizakie Rio, Joint Mission Director Samagra Shiksha, Nagaland nung aden.

Iba sentong nung tongti tesemdangerji Union Minister of Education Dharmendra Pradhan liasü aser north east state tem nungi Education minister tem aden.

## Municipal body temi Nagaland sorkar lemtet magizüker

**Kohima, November 21, 2021 (TYO):** Nagaland nung Dimapur, Kohima aser Mokokchung municipal body asempi Nagaland sorkar lemtet magizüker.

Nagaland sorkari Urban local bodies (ULBs) nung advisory councils nung nisung shimoktsü telemtetba ka agia lir.

Deobarnü Kohima nung Dimapur Urban Council Chairmen Federation (DUCCF), Association of Kohima Municipal Wards Panchayat (AKMWP) aser All Ward Union Mokokchung Town (AWUMT) külem senden ka amendang iba telemtetba agiogo.

Hotel 2K nung osangbener den jembidang Sessional chairman & AKMWP president Thejao Sekhose den AWUMT president Limanungsang aser DUCCF president Tsenthungo Nyamo

nungertemi sorkar lemtetba magizükba osang metetdaksü.

Tanü units asempi Department of Urban Development indang sangdong nung shia aliba onüktem jungjunga lemsatep, ta Thejao Sekhose-i ashi.

November 18, 2021 nü Nagaland sorkari ULB advisory council nung nisung shimoktsü sangdong agütsüba magizüktsü lemtet, ta paisa ashi.

Parnokisa state sorkar dang tekaratiba nung Nagaland Municipal Act 2001 yanglushir ULB elections agitsü ayongzükogo.

Sorkari ULBs nung advisory council tentetsüba anena atatsüla aser ibaji melena tekaratiba nung nübortem ola angaa ULB elections agitsüla, ta Sekhose-i metetdaksü.

Nagaland Municipal Act

ajanga Arrla 371(A) nung timtem magütsütsü atema state sorkari mapa inyaksüla, ta paisa ashi.

"Municipal Act 2001 nung tapar kar ajanga Constitution indang Arrla 371(A) nung kongshiba onoki nguogo. Anungji onoki sorkar dang itemji jangjashitsü aser tekaratiba nung municipal elections agitsü ayongzük" ta paisa metetdaksü.

Sorkari advisory council tenteta mapa inyaka ora nenoki kechi inyaksü ta osangbener asüngdangdang "sorkari ibaji meinyaksü imlar" ta Sekhose-i langzü.

Sorkar ya nübortem atema aser nübortemi tentetba lir anungji sorkari nübortem ola angaa advisory council tentetsü lemtetba meyipa agitsüla, ta paisa metetdaksü.

## WC, NNPGs-i NSCN (R) osang jangjashitsür

**Dimapur, November 21, 2021 (TYO):** Vice-President Akato Chopi-i party anema mapa inyakba atema NSCN (R)-i pa anentsüba telemtetba pusama nungiter ta Working Committee, NNPGs-i metetdaksü.

"Iba ama tongtipang mapang ka nung Akato-i NSCN (R) ashioktsüba den külemi Naga kintem aser civil societies temolung yirutsüogo. Pa nija konang atema telok aika nung melentepa inyaker kati NSCN temzüng indang mejembitsüla" ta Media cell, WC NNPGs-i sangdong ka nung ashi.

NSCN (R) sasep nung mangatettep adokba atema WC Convener aser Co-Convener temi tiyongtsü nung ia jembishinüba sülen October 22, 2021 nü tenangzüktep ka nung sign asü.

Akato Chopi-i iba tenangzüktep molunga agizüker sign asü saka tang pai ibaji mali kümtsüogo aser temolungtetba shitak malir kati sen yong par linük aser külem inyakerkem ashioktsütsü renema lir ta parnoki metetdaksü.

"Tang ama tensa ka nung telok

tasen ka tentetsü lemtetbaji tejashitsüka, lokti asoshi maaksü aser par kin asoshi tenüng menük ka lir. Naga arogotem aser ki ajak nung tekaraba nung yimten latetsü indang jembiba mapang ka nung tangatetba shitak aliba tanishir kati iba ama mapa ya meinyaksü aser WC, NNPGs o Naga nungeri item ama nisungtem dang tamang makatsü.

Akato-i NSCN constitution kümzüka ayur ta ashibaji pa sasa pa lutsürba lir kechiyong pai tashi aser sen angutsü atema NSCN constitution nung lateta aliba onük ajak alema pai inyaksangshir. Iba jagi NSCN (R) aser W/C of NNPGs nungi pa züngdokogo, ta Media cell sangdong nungsa shia lir.

Pai NSCN (R) loksaba aser kasa tenüng amer ta jembiba nung tajemdakdak kecha mali kechiyong pa NSCN (R) nungi meindokogo aser NNPGs tangatetba nungi pilaogo, ta parnokisa ashi.

WC sabang nungi NSCN (R) Vice President Akato agienba ajanga NNPGs nung

tetsükdaksü kecha malitsü. NSCN (R) sasep nung mangatettep onük ya tangatetba nung masü saka Akato-i finance minister, tax collector, treasury officer aser cashier ama inyaknüba ajanga lir. Iba ajanga dang mepetmesüji adokba lir aser India sorkar den yimten olemtep den kecha agia sendaktepa mali, ta Media cell-isa ashi.

Hoito yim nung Vice President nungi aentsür Akato den külemi alirtemi President Y Wangtin Naga aser Ato Kilonser P Tikhat nati aniba NSCN (R) nung adentsü ayongzük. Iba ya kin, nisung mesüra kibong tesentaktep indang masü saka Naga teblemstü ka lir, ta WC, NNPGs-isa metetdaksü.

"Naga kin Hoho 14 aser tanga Naga teloktemi 'political faction' tasen metentetsü lemtetba nung NNPGs noktaka lir. Naga kintem aser tongti Civil societies teyari aser sarasadem ajanga onoki tekaratiba nung yimten telemtetba ka agitsü atema lenmang bushiteptsü" ta WC NNPGs-isa metetdaksü.

## Centre-i Farm laws meyipa agiba sülen aluyimertemi "Sansad Chalo" ayonger

**New Delhi, November 21, 2021 (Agencies):** Centre-i Farm laws 3 meyipa agiba osang sangoktsüba sülen Samyukta Kisan Morcha (SKM) züngsemtem Deobarnü Singhu arrtsü nung adenshir senden ka menogo.

SKM-i tarutsü nung inyaka aotsü sentong kar atong aser iba nung November 29 nü Parliament Winter Session tenzükdang Parliament-i jajaa aotsü dena lir.

Prime Minister Modi-i farm laws agienba osang metetdaksüba sülen tanü mezüng senden amendang aluyimertemisa Prime Minister

Narendra Modi dangi yimjak nung shidi ka zülutsü aser iba nung Minimum Support Price (MSP) dena parnoki akhangba onüktem zülusemstü lemtet.

Prime Minister-i ozüng agienba osang metetdakjaka ozüng asemji official süa magien tashi parnoki maneni lungkak aittsü ta aluyimertemi shiogo.

MSP indang ozüng ka latetba den külemi tesüiba küm ka tsüngda lungkak aita arudang police-i parnok anema ken o balala benoka aliba meyipa agiang ta aluyimertemi ashir.

Asüng Lucknow nung Kisan Mahapanchayat ka alitsü,

November 24 nü British India politician Sir Chhotu Ram tasoba anogo tenüng nung Kisan Mazdoor Sangharsh Diwas amongtsü, November 26 nü Delhi arrtsüleni jaja aotsü aser November 29 nü Parliament-i jaja aotsü, ta tanü SKM-i metetdaksü.

Nov 24 nü farm laws indang bills agizüktsü:

Union Cabinet-i Bodbarnü farm laws asem meyipa agitsü atema bills agizüktsü akok ta tanü osang ka ajanga metetdaksüogo.

Parliament Winter Session nung item bills benoktsü, ta sorkar osang ajanga ashi.

### KROS College-i Principal den tepila sentong agi



**KROS College Kohima nung November 20, 2021 nü Principal mapa nungi anensang, Dr. Kekhrielhoulie Yhome den tepila sentong agiba mapang tangokba noksa ka yangi angur.**

**Dimapur, Yimpoksüi/Nov. 21 (TYO):** KROS College, Kohima ajanga Principal nungi anensang Dr. Kekhrielhoulie Yhome nem akum agüja tepila sentong ka College telungzük nung November 20, 2021 nü agia liasü. Iba sentong ya IQAC Cell ajanga ayongzuka liasü.

Iba mapang Dr. Kekhrielhoulie Yhome-i kaketshirtem dang taküm nung mapang melenshia aiba den lirumedema aintsü ajungshia liasü.

College Vice Principal, Assumi den lokti tenü nung student council aser teaching faculty nungia tepila o jembia

liasü aser ano College tenü nung aser kaketshir tenü nung sempet agüja liasü.

Iba sentong nung English Department nungi ken tena tsüngsangba den ano sangru zünga liasü. 5 Semester nung azünger temia tepila ken ka atema aser ano kaketshirtemi temeja ken ka tena liasü.

### Rotary Club Kohima pur 18th Chartered Night alitsü

**Dimapur, Yimpoksüi/Nov. 21 (TYO):** Rotary Club Kohima, Rotary International, Dist-3240 pur 18th Chartered Night ya November 22, 2021 nikongdang 5:00 ako nungi tenzuka Capital Convention Center, Kohima nung alitsü.

Governor of Rotary International Dist-3240 ajanga Hotel Japfu, Kohima nung chartered süja liasü aser iba sentong nung Chief Minister Neiphiu Rio lia Nagaland Governor-i moaja liasü.

Shishilembar, university aser college nungi tesayurtem, doctor, lawyer, bureaucrats, technocrats amala wadang balala nungi iba

mapang chartered süa "Service Above Self" omen nung ajemdaka aliba tentet nungya züngsem kuma liasü.

Rotary Club Kohima tir, Rtn. Kezhokhoto Savi-i iba club züngsem ajunga dang pei kinungertem anir arua oba sentong nung adentsü ayongzuka liasü.

# NATIONALIST DEMOCRATIC PROGRESSIVE PARTY (NDPP)

*Facta non Verba*

## 4<sup>th</sup> General Convention



**23<sup>RD</sup> NOVEMBER 2021**

**NDPP OFFICE KOHIMA, NAGALAND**




### Security Forces temi ozüng nung aibelener asem apu

**Dimapur, Yimpoksüi/Nov. 21 (TYO):** Security Forces temi State Police den lungjemer November 19, 2021 nü Dimapur district kübok Pherima nung operation ka agiba mapang temesepba mozü ayoker nisung ana den temesepba mozü pua liasü, ta sangdong ka ajanga ashi.

nem agütsüogo, ta sangdong ajanga ashi.

Maneni Security Forces temi Police den lungjemer general area Burma Camp, Dimapur nung November 18, 2021 nü operation ka agiba mapang NSCN-IM züngsem ka pua liasü, ta sangdong ka ajanga ashi.

Osang tejangja ka nung ajemdaker Security Forces temi Police den lungjemer operation agiba mapang temesepba mozü shibelena atoker ana apu aser tena ket nungi sen lakh 15 shi jenjang Marijuana seret 30 nguteta liasü.

Osang tejangja ka nung ajemdaker Security Forces temi operation agiba mapang NSCN-IM züngsem ka apu aser pa ken nungi ozüng alema senotsü saruba slip ana den tai aputsüla kuli kaket kar nguteta liasü.

Iba ken o maneni bushisüngdangtsü atema pua alibang den pa ket nungi ngutetba osetem East Police Station, Dimapur nem nungi ngutetba oset ya Medziphema Police Station

Iba ken o bushisüngdangtsü atema pua alisang den pa ket nungi ngutetba osetem East Police Station, Dimapur nem agütsüogo, ta sangdong ajanga ashi.

### KCUM ajanga Mangkolemba-Khar tsüngta lenmang yanglushi



**Dimapur, Yimpoksüi/Nov. 21 (TYO):** Mokochung district kübok Mangkolemba aser Khar tsüngta link road ka November 19, 2021 nü Khar Citizen Union Mangkolemba (KCUM) ajanga yanglushia liasü.

tatsüba kumdaktsür.

Iba lenmang yanglushiba mapang senotsü, osettsüset aser talisa nübu agütsüba atema EE, PWD (R&B), Mangkolemba; Contractor, ANK Construction, Mangkolemba jila nungi temolungertem aser senzüsemponger temi tenüng memetetdaksüi tenla balala agütsüba atema pelar, ta KCUM ajanga sangdong ka nung ashi.

Iba lokti nübudok nung Khar nungi aser Mangkolemba nungi temolunger nisung 250 shi arua shilem agia liasü.

Mokokchung jila den Mopungchuket ajanga Mangkolemba jila sendaktepba nung Mangkolemba - Khar Link road ya tongtipang lenmang ka kumogo. Senzüsempongertem asoshi iba lenmang ya tongtipang ka akumer, talisa Mokochung, Zunheboto aser Tuensang district nungi Dimapur/Assam tsüngta mapang ghonda asem shi agi

Sorkari iba Link Road nung temolung agütsüra, Mokochung, Zunheboto aser Tuensang district tem nungi nüburtem asoshi temelenshi tulu arutsü. Tanü tashi iba lenmang ya küm shia Khar Village Council, Khar Citizen Union Mangkolemba aser temolungertemi anepalua arur, ta sangdong ajanga ashi.



Padumpukhuri Village Council züngsemtem, GBs aser yimtsüng nung lenirtemi yimtsüng telungzük nung dokan tem mita aoba mapang yi jenti nguteta November 21, 2021 nü raksa indokja liasü.

## CM Sangma-i Mawlyndep Community Center semzüksü



**Shillong, November 21, 2021 (Agencies):** Honibarnü Ri Bhoi district kübok Mawlyndep yimtsüng nung Meghalaya Chief Minister Conrad K Sangma-i Mawlyndep Community Center aser BioFloc Fish Tanks semzükja liasü.

Iba sentong nung Sangma-i, State nung Community center tem rongnung Mawlyndep Community Center ya tajungtiba asütsü, ta ashi.

Mawlyndep yimertem nem tenüngsang agütsüba mapang, Sangma-i, iba Center ya yimertem longjemer inyakba tatishitsü tajung ka lir.

Sangma-i ashiba agi, Tourism atema Mawlyndep ya tesem tetemen ka lir aser iba tesem nung resorts, restaurants aser

tanga Tourism facility tem yanglua iba tesem ya Tourism road circuit kati melentsü akok.

Mawmaran tashi lenmang yangluba ajanga iba tesem (Mawlyndep) nung Tourism ajungkettsütsü aser iba lenmang yanglutsü atema World Bank ajanga sen cr. 15 agütsüogo, ta Sangma-isa ashi.

MITP kübok Mawmaram nungi NEPA Junction tashi cr 64 indang project inyaksü, kong kilometer 41.527 shi ayimjema yanglutsü; aser iba project ya Nov 2024 [42 months] tashi nung renemtsü imlar.

Chief Minister's Special Development Fund ajanga Mawlyndep Community Center ya shilem ka nung senotsü agi nungitta yarir.

BioFloc Fish Tanks lapokba mapang, Sangma-i, State nung nüburtemi ango timba achir, kong küm nung nüburtemi (Meghalaya) ango metric ton 30,000 shi achir.

"Meghalaya State nungi ango shilem 50 (nüburtemi achiba) dang adoker asünung, 'demand aser supply' nung ongdang tuluka lir," ta pai ashi.

Nübur jangratema alitsü aser sen arulen lenmang bushitsü atema iba ama technology amshitetsü akok. Ibaji ajanga nübur nungdakba (demand) dang masü saka parnok libaliro jentang melentsü aser iba den külemi State nunga rongsenketzung jentang tajungba akümtsü.

Chief Minister, Sangma-isa Mawlyndep nem ODF Certificate agütsüogo.

## College pungo nem University status agütsütsü: CM Sarma

**Guwahati, November 21, 2021 (Agencies):** Assam nung college pungo- Lakhimpur, Nagaon nungi college ana aser JB Law College, Jorhat; Sibsagar College, Sivasagar aser Handique College, Guwahati nem taruba küm ana tsüngda university jentang agütsütsü, ta Assam Chief Minister Himanta Biswa Sarma-i ashi.

Guwahati kübok Gauhati Medical College Hospital (GMCH) auditorium nung North East Education Conclave agiba mapang, Sarma-i Assam indang college pungo nem University jentang agütsütsü osang metetdakja liasü.

"Taruba küm ana tsüngda Lakhimpur, Nagaon, Jorhat (JB law college) den külemi Sivsagar college aser Handique Girls College nem University status agütsütsü asoshi onoki lemtetogo" ta Sarma-i ashi.

National Education Policy (NEP) mapa küma inyaksü asoshi Assam-i takok ngua



Himanta Biswa Sarma

inyakogo, ta pai ashi.

"Iba policy mapa küma inyaksü atema state sorkari high-level committee ka tentetogo, iba draft mapa küma inyaksü aser Rajya Shiksha Ayog renema lir" ta Sarma-isa shisem.

"Iba maparen achayangtsü asoshi inyak tenzükogo. Online teacher transfer, recruitment atema asalentong ka yangluogo.

Maparen ajak bilemba ama takok ngua odaki," ta paisa metetdaksü.

## Bru refugee camp nung ki 18 rongdok

**Guwahati, November 21, 2021 (Agencies):** Tripura kübok Panisagar subdivision nung Hampsapara Bru camp nung Deobarnü kitsükkirong lendong ka nung ki 18 tashi rongdok.

Iba ajanga takoksa angurtem anienogo. Tripura police aser local administration-i akokba teyari agütsüdar ta osang angazüker.

Iba ya electric short circuit

ajanga adok ta bilemer saka kuli tejangja mangu lir.

Bru mesüra Reang nunger ya Northeast India nung lisopur kin ka lir aser parnok ya teimba ka Tripura aser Mizoram nung alir.

1990s tatemlen ka nungi Bru nunger nisung meyirjang aika Tripura nung relief camps nung jenoker liyonga arur.

Hampsapara nung aliba relief camp nung Bru nunger jenoka lir.

## IIT-Guwahati nung Nano technology aser Indian Knowledge System centres lapok



**Guwahati, November 21, 2021 (Agencies):** Deobarnü Union education minister, skill development and entrepreneurship, Dharmendra Pradhan-i IIT-Guwahati semdang aser Centre for Nanotechnology (CNT) o Centre for Indian Knowledge System (CIKS) lapoktsüogo.

Pradhan-isa IIT-Guwahati complex nung hostel ana lapoktsü aser NEP 2020 indang kaket ka sayatsü.

Iba sentong nung Assam education minister Ranoo Pegu aser Guwahati MP Queen Oja na aden.

IIT-Guwahati ajanga

international aser national ranking systems aika nung jentang tajung ngutetba atema Pradhan-i tenüngsang agütsü.

IIT-Guwahati ajanga inyakba den Northeastern region nung terenlok bener arutsü indang mapa inyakba atema pelar, ta pai metetdaksü.

"IIT Guwahati-isa kaketshirtem den disaster management, biodiversity-based research, green energy development, strengthening knowledge-based economy aser driving entrepreneurship indang sayutsüla" ta Union Minister-isa ashi.



**GOVERNMENT OF NAGALAND**  
**DEPARTMENT OF WOMEN RESOURCE DEVELOPMENT**  
**HORNBILL FESTIVAL**  
 ~cum~  
*Myki Fest, 2021*  
**OPEN COMPETITION ON**  
**PREPARED SPEECH AND ACRYLIC PAINTING**  
**for Ladies and Gents who are 18 yrs and above**

**Theme**  
 "Women Empowerment vis-a-vis Government Policies,  
 Customary Laws, Entrepreneurship and Self-Employment"

<p><b>PREPARED SPEECH (6 DEC)</b>                  750-800 words                  Typed speeches to be submitted to the Directorate on or before 29 Nov. 2021 for screening                  20 candidates for Finals                  TIME: 12 NOON ONWARDS</p>	<p><b>ACRYLIC PAINTING (7 DEC)</b>                  JPEG pictures of original paintings to be submitted to the Directorate on or before 29 Nov. 2021 for screening                  15 candidates for Finals                  TIME: 11:00 am to 03:00 pm</p>
--	--

**Submission may be done online to**  
[mykinagaland@gmail.com](mailto:mykinagaland@gmail.com)

<p><b>1st Prize : Rs. 20,000/-</b>  <b>2nd Prize : Rs. 15,000/-</b>  <b>3rd Prize : Rs. 10,000/-</b>  <b>Consolation: Rs. 3000/- x 5</b></p>	<p><b>1st Prize : Rs. 30,000/-</b>  <b>2nd Prize : Rs. 20,000/-</b>  <b>3rd Prize : Rs. 15,000/-</b>  <b>Viewers Choice: Rs. 10,000/-</b>  <b>Consolation: Rs. 3000/- x 5</b></p>
--	---

Easel and Canvas will be provided for Acryllic Painting Finalists.  
 Candidates are to bring their own paints and brushes.

**Venue**  
**Women Resource Development Gallery**  
**Hortiscape, Heritage Village, Kisama**



# TIR YIMYIM

## YIMOBILEM (EDITORIAL)

DIMAPUR TENTONÜ, YIMPOKSÜI (NOVEMBER) 22, 2021

### Naga yimten ya tangsa tang latettsüla

**S**hitakba agibo, tanü tashi alima nung ya Naga nungger ta asüba kin ya kin chanu tapu kwiar mejangjatetter, saka iba onükji yutsür, tang Naga nungger yimten nüjiso bushir teloktem rongnung telemsa adokpet adoka telok balala razüka aoba yagi alima tsüngdang taaktsüka kümogo. Shidi asü nungbo, tangbo linük nüchiso bushirtem ajak India den yimjung nung alir asünungji, kecha tetsübu aser tarendak makai tema nung, pei kinunger aser yimtsür yimertem den külemi lia pei kibong asoshia mapa inyaktsü mapang angur. Ano, Naga nungger yimten nüchiso bushir teloktem temang ka kuma melongjemtetaka, telok ajak pei pei meten India den yimjung nung yimten ken o jembite zükter joko mapang talangka arur aser telok teimbaka den ken o tatemleni arua jembiba angashir aser tanungba telok dena yakta ken o tangatetep kati arua tembangsü imlaseta atar. Iba tangatetba nung, Nagaland nungbo assembly nung opposition-a mali kuma tema nung alir yimten telokbo ajak ka kuma longjemogo. Ajisüaka, yimten nüchiso bushirtem rongnung longjemtsü melen telokang tali teimba kuma telemsa adokra, Naga yimten nüchiso angutsüba maparen nung shingai meyaritettsü. Shitakba bilemdangdi süra, telok tenet ti tashi lemsar Naga nungger asoshi yimten nüchiso bushiba mapaji suwar mapa lir. Iba jagi asenok nüchi akümtsü melena yiar kumadoker. Joko, asenok Naga nungertem yimten nüchiso asoshi rarararaa kechi atema asenok raraer mejangjatetka kümogo. India-ibo tangsa asenok den Naga yimten tebilemstü ya tatem kuma latetner, saka asenoki maritepner ta asüba asenok temulungjangji angatettsü tasak. Aji oda, Naga yimten telatetba tasen kati marutet kum ka süli, Naga nungger yimten nüchiso bushir teloktem rongnung tanishir ka süli, ano kum ka süli, tanishir ka süli ta joko akhidang Naga yimten nüchiso asoshi taküm ajak bendanga agüja tenzüka arur lenirtembo ajak sümadagi. Joko, asenok arem nung ali chia aser süngo tu mejaka aser ayong tüzü tazü jema linük asoshi rarar masü saka asenok India government-i lezmüksüba 'designated Camps' nung lia Naga yimtem nüchiso atema India den jembir. Joko, designated camp nung alidang asoba chirnurtema teka agi jeta peisasa pei taküm lia otettsüsa tain kümogo. Item jagia Naga parnok tarutsü anogotem asoshi kechi ashir, aji kanga tongtibang asütsü. Asenoki tuluka bilemyonga, India government-i lezmüksüba designated camp nung lia India government-i agütsüba Identity Card aser Passport benerbo Naga yimten nüchiso asoshi talangka jembia moutettsü. Iba tia aser jenjang jagi asenok dang tekaratiba nung India den Naga yimten jenjang tasen ka lateta adoktsü ashir. Tanü aliba jenjang yagibo asenok nem pei tetsü tasoli meimba indang shisatsü masü peisasa pei taküm aser pei kibongang meimba shisatsüang ka inoktsür. Iba jagi, aikati linük tenzüka mapa nung makamait aser timtem maremer. Yimten nüchiso bushiba mapa nung iba ama shisatsü aser tangatetba nungji takoksa aser lendong keta lir. Asenoki asen tetsü tasolima asoshi inyak nungbo, alima rongsen aser temaba jenjang marishitsü aser tenükshia menükshitsü. Aji oda, yimten nüchiso bushiba ya tenüng agidang bushir ka kumadokra, Naga nungertem tamasayongi yimten temeten indang ya mejembiang tajungba süla ta sasatsüsa anogo ka ajurutsü ana nung lir. Joko, asenok Nagaland nung alirtema Naga yimten otsü jembia yimsüsür akümba ya temoatsü masü saka lendong menar amato bilemdi, kechiyong Naga yimten nüchiso onük jembia election agili, Naga nungger yimten nüchiso telok teimba kumli ta asüba ya, jungjunga bilemdangra, Naga nungger rongnung telok telok aika kuma lemsar azü tokshia raratsü renemtepba sentong ka dang asütsü. Naga yimten nüchiso bushirtem rongnung telok balala tali tali kuma aoba ya, India dak Naga yimten ken o jembiba nung temulung machiba agi masü saka asenok rungnung kati ka dak temulung malem aser temulung machiba agi telemsa tali tali adokba ajanga lir. Ibaji asenok o asenok na raratsü atema injang bomb yanglur amai lir. Ibaji asenok asoshi lendong tulu aketba mapa lir. Iba lendong nung jagi shinga mejenbutsü, anungji tonga marudang jet ta nokdanga adoktsüla. Joko, Naga nungger yimten nüchiso angutsü temeten maliba agi masü, saka Naga nungger yimten nüchiso bushir telok ter metsü kuma moudaktsütsü mechü, ait nung ken o jembirtemi, tangsa tang, Naga yimten ken o ya India den , teti atema tatembang kuma masüyonga, tanü tendak asen dak apet yimten jenjang ka nung lateta toktsütsüla. Iba jagi, Naga nungger alima tsüngdang nokdaker maksü angutsüba tia tamajung tuluka nungi kumzüksü.

# OLEMSABANG

## AROGO NUNG TETSÜRA DEACON BOARD NUNG SHIMA INYAKDAKTSÜTSÜLA

~ Esther (Khar)

(Yashi adok nungi...)

Asenoki Tasen Lai nungji kodang reprangdangdir Rom 16:1, nungji yamai shia angur. "Kenkerea nung Arogo Deacon ka asen adianutsür Foibi indang ni kü kuli agütsür" ta shia lir. Paul-i Kenkerea nung adianutsür ka Arogo deacon inyakba indang kuli ka kanga jangja shia angur, süra yamaji asen Arogo nunga tetsür ka deacon inyaktsübaji ya Laishibai melaba ta asenoki meratai angatettsü akoker. Anungji shitakba Khristar Arogo yangertsü asoshi Arogo nung nütsüng nüburtem nem tim tesayuba Lai O dak ajemdaker amangbapurttem nem tangatetba aser tesayuba agütsütsü kanga dang nungdaker.

Alima balala nung Arogo aika nung Deacon lir, aser arogo kar nungbo Deacon-temji tetsür teimba nguogo saka kecha complain mali ta tangur aser temetetertemi ashir. Asen Lima nunga Arogo kar nungbo joko kum ter (10) dak alia Deacon Board nung tetsür aser tebur longjemer tenzüka arur, tang tashi nung iba jaki Arogo nung kecha tetsükdaktsü bener aruba melika, saka parnok tetsürtem atenba jaki Arogo nungdak tajungba jembitetter aser tapensaba inyakteter ta ashir. Meimchir shia nem Tsüngremi sempet balala agütsüba ama teburtemi merajemba lemang aisü nung tetsür Deacon-temi tajungba rajemtsür aser Khristar Arogo iba jaki ano tali tashi itdaktsür.

Mapa tasen ka atema arendaka bilemstüji tim dang, saka tajunga ta chidangteter aliba Arogotemi anir temelenshi ka atoktsü asoshi merangdangtsübaji kanga dang nungdaker. Asenok kum aika sobaliba den sütepa inyakyima aruba agi melenshitsü mapang agir, aji saka Arogo ishika nungbo Deacon nung tetsür anioka lir ta asüba tetezüji temelenshi aliba tamaittsü lir. Inyakyim angateta arua melenshitsü mapang agir ta asüba nungji ajemdaker ano melenshia aotsü aremzüka tesayuba agütsüteptsü kanga tongtibang lir ta angatetdi.

Tanü putu nung Arogo ka tejakleni odaktsüdi süra Deacon Board nung tebur aser tetsür anaprongla alitsü nungdaker, aser Ministry balala nung toklanga tenzüker ajak Deacon board nung atentsübaji kangasa tongtibang lir. Asen Ao Arogo kümsük 150 jubilee amongtsü renemteper, saka biblical church Model (BCM) tenzüker kum asem pezüka dang aor ta jembir. Koba church Model ka südir süaka Khristar Arogo structure nungbo tetsür-tebur kecha tebandang melii amshitsübaji kanga dang tim lir. Anungji tetsürtema Arogo shia nung Deacon Board nung shimtsüla. Aser Deacon board nung dang masü saka tenük-telen ajak nung kasa shilem agitsüsa lenmang lapoktsütsüla. Arogo kar nungbo tetsüra mapangtsür inyaka aruba angur, teburtema mapangser inyaka aruba sülen Arogo khuret aser mapa angazüka meteta arur külen oda temsüa alibapurbo Deacon Board nunga shimoka amshir, iba ama tetsüra mapangtsür inyaka arur külen temsüa dang lira Deacon shimtsüjia kanga dang tajung asütsü ta bilemer. Hau! Deacon inyaktsü atema mapangser/mapangtsür inyaker alitsüla tabo masü, saka Arogo mapatem angazüka khuret angateta alibajisa Deacon inyaktsü asoshi tajungtiba nübu, takümüji asütsü ta bilemer.

Akhi asen Otsüla-oboula nungger aser asen tsüraburtem mapang nung amshia aruba tamaittsü ka indang khen shisadangdi, par putu nung talisa kanga nungdak süa amshiba kaji parnoki kidang, Alu nung, aser arem meta balala nung sorochioka taküm chiyungtsü renemba koba meshi-Lung asem külemi tekolak medema azünger yangji jangratema kechisarina ajak tazü nungi tamen kuma sorochioka chiyunga taküm nung tepela angubaji koda tesüngmangtsüka liasü; asenoki khen aroka shisadanga meshi-lung asem tetezüji Tebu, Techir aser Tanela Temeshi mesüka lir. Akhi mapang nunga oda Tsüngrem dak mamangaka pabo asen den teti liasü ama iba tamaittsü jaki angatettsü akoker.

Tanabuba nung, meshilung asemji Arogo Deacon Board nung tebur, tetsür aser Arogo nung toklang tenzükertem mesüka lir ta asenoki angatettsü akok, aser yamaji itemji tekolak medema shisa obang ka ser Kibubar Arogo kaji sarasadema bener ora yangji Kibuba mulung chia par sentong jenti ataloka Tsüngremer sentsüwangshi tali jungkai atoktsü südi ta amanger, aser idangji Arogopur temoatsü jenti ngua amangbapur tzüratema tepela anguba taküm aser kibongtem asütsü yimlar.

ABAM kübok town Arogo kar aser yimtsüng Arogo kar nung tetsür Deacon shimer inyaka odagi, Arogo sasep nung Deacon Board memberji 7, 9, 13 ta yamaji pei Arogo yari balala alir, Area wise Deacon shilemji asadanga tetsür Deacon-ji noklang nung ter (10) shilema matonger ta ashir. Saka noklang shilem nung 50% ta sa mesüaka oda parnok teyaritepji kangasa junger ta asüba kuli lir. Meimchir dangji tebura aser tetsüra kar nungibo pei shilem teyaritepji kanga junga agütsür saka kar nungibo tera tajemba ta lir.

Deacon tetsürtemji tetsür telok tenüng nung ta masü saka arok lokti Arogopur ka ama dang lir aser yamaji asütsüla, saka tetsür deacon paikajibosa alitsüla ta mayuyonga kecha masü. Saka arok Arogo den liru medema inyakyima aotsü asoshi maneni asen Arogotem ajak nung tetsür Deacon agitsübaji temsüa dang lirbo shimtsübaji tanü Arogoi nungdakba shilem ka lir ta angajemdi aser Tsüngrem yimli atema arung asenoki shisadanga kinungtsüi koda kibong nung ajak asoshi tajungtiba agi anepalur, aji mesüka tobur junga Khristar Arogojia yangerdi. Galatia 3:26-28 nungji yamai shia angur, "Kechiyong Khrista dak tamang akaba ajanga nenok ajak Tsüngrem chirtem lir, kechiyong nenok shir Khrista nung Baptiogo, nenok Khrista dak sübuogo. Yihuda nungera masü, Grik nungera masü, Alara masü, Nüjia masü, Tebura masü, Tetsüra masü, kechiyong nenok ajak Khrista Yisu nung ka dang lir."

Govt. mapa balala nung mapa yari qualification nungdaker, yamaji mapa den sentakba sempet aketer nisung nungdaker. Süng Lung taret ajungshitsü atema tebur nübu nungdaker, sorochioktsü nung tetsür tajungba asünung tetsür nungdaker, yamaji alima inyakyimtem nung tapet nübuji nungdaker. Arogo nung tenzüksü atema nungdakba qualification-ji Khrista akaba aser tenzüksü tanela sempet akaba ya lir, tebur, tetsür ta masü, par mopu, ozü mopu, par kidong, ozü kidong ta masü saka shiba Khrista aka, shiba Tsüngrem tanela agi sünga lir, shibai ochi nung Khristar arogo tenzüksü bendanga agütsür parnokji shima tenzükdaktsütsübaji dang Tsüngremi mulungba tenzüker ka asütsü. Aji saka Tsüngrem O tejangja meteta yur Arogo inyakyim nung kirakdi ta asubaji meimchir tashi mait lir. Arung amangbapurttem, temsüa dang lira tebur, tetsür kecha telemdang makai shima tenzükdaktsüdi, tetsür tebur ta mebilemi pei sempet-i dang Tsüngrem tenzüksü ta bilemdi, shiba Tsüngremi shimba lir ta asenoki sarasadema bilemdangdi aser Tsüngremi mulungba ama inyaktsü merangdi.

Koba church model ka südir suaka Khristar Arogo structure nungbo Tetsür-tebur kecha tebandang melel amshitsüla. Tetsürtem Arogo shia nung deacon board nung dang masü, saka tenük-telen ajak nung kasa shilem agitsüsa lemang sadema lapoktsütsüla. - Zulu Jamir

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Khristan lenirtemi sorkari aluyimba ozüng 3 agienba pelaa agizüker

**November 21, 2021:** Tawa India Ato kilonser, Narendra Modi-i aluyimba dak sendakba ozüng tasen asem agientsü sangdongba atema Khristan lenirtemi pelaa agizükba lemsatepogo.

Yaküm November ita nungi tenzüka aluyimertemi ozüng tasen asem anema longkak aitba tenzüka sülen tang tashi nung aluyimer 700 jungnüa süogo.

Office of Labor, Catholic Bishops' Conference of India (CBCI) Chairman, Alex Vadakumthala-i, "Aluyimertem aser linük nüburtem atema sorkari telemtetba tajung agiogo, aser onoki ibaji pelaa agizüker," ta metetdaksü.

November 20, 2021 nü osangbener den jembidang Kerala kübok Kannur nung tongti putirisa, "Tzü-mopung lendong mesüra wara ajanga asür aluyimertem kibongtem nem sorkari senotsü teyari agütsüsüla," ta ashi.

"Aluyimertem kanga timtema aruogo saka tatemsabo

junga tembangogo. Sorkari tekong memerang asübo aser ozüng mebenokdangyongi aluyimertem den tama jembi asübo aluyimertemi timtem majangshila. Asen linük tongtirit ji aluyimertem lir," ta pai ashi.

CBCI Justice, Peace & Development Commission Chairman aser putir, Gerald Almeida-i, item ozüng mebenokdangyongi sorkari ajanga timtem adok, ta ashi.

Madhya Pradesh kübok Jabalpur nung tongti putir, Amleida-i, "Item ozüng ajanga aluyimertem income anasü agi tali akümtsü, ta sorkari nangzüka liasü, ajisüaka sorkari aluyimertem atema fertilizers aser aluyimba osettem nung jenjang ang tali atu," ta ashi.

"Item ozüng ajanga tilateri aluyimertemi timtem ajangshi, aser tanga aluyimertemia timtem ajangshiogo, kechiyong nija teloktemi aluyimertem nem jenjang tatakzük magütsür. Alu nungi züsentetbatem nung jenjang tatakzük ali nungang

aluyimertemi tajangzük angur, aser ibaji sorkari dang inyaktetsü. Menor asüyonga sorkari telemtetba tajung agiogo," ta pai ashi.

Modi-i aniba sorkari tekong merangyonga aluyimertemi item ozüng magien tashi maneni longkak aittsü, ta telemtetba agir liasü.

Almeida-isa, kobi melii Uttar Pradesh aser Punjab densema state kar nung assembly election agitsü aliba ajanga sorkari iba telemtetba agi asütsüa akok, ta ashi.

India nung nütsüng timba aliba state ji Uttar Pradesh lir (nütsüng million 220) aser iba state nung BJP jenjang kanga junga lir, ajisüaka election survey ka ajanga taruba election nung BJP-i assembly menden 200 dak tema nung takok mangutsü, ta asadangteta liasü.

Ano Sikh nunger aser aluyimertem timba aliba state-Punjab nunga election rally agitsü atema BJP lenirtem nem temelaba magütsür.

## ANO GO ABEN TSÜNGREM DEN

### Asenok temeimi rongmesoba

O temeshi Oba, alimai na memetet, saka ni na metet; aser Nai ni yok ta item yagi metet: aser ni parnok nem Ne nung metetdaksü, aser ano metetdaksütsü, anungji kechi temeim agi Nai meim aji parnok dak alitsü, aser ni parnok dak alitsü. Yohan 17:25-26.

Nai Tsüngrem yimlijji metetet; nai Tsüngrem yimlijji noktanger. Pa temeimi ne dak mekongshi tashi na Tsüngrem anasa alitsü makok. Kotaker Tebui Techir dang tatem maka temeimi meim. Tebui temenen lima temulung raksaa meimba Pa jabasoi Pa taküm ajanga jungkai adoktsü. Tebui meimchir kümzüksü sentong atong aser Techiri mapaji agizük. Iba jagi Pa kangki dongi ani.

Yisu meimchir rongnung jajadang, Tebu temeimi par chir süngdaksü. Mashi temeim agi Pa kangki atutsüsa majungshitsü ta Yisui metetta liasü. Meimchir temeimi Pa taküm ajunga agi Tebui ashiba abensaa tashi angatsü makok ta Yisui angatetta liasü. Tebu tekümtet mapa sentong nung Pa taküm bendanga agütsütetsüsa Tebu temeimji dang tashi tait liasü.

Kasa temeimji nütsüngtem nema agütsütsü Yisui sarasadem. Tebui parnok nem agütsütsü aliba mapa atemaji tanga tajung shibaji teperi masü ta Yisui metetta liasü. Tsüngremer telangzübaji Par chir parnok dak lidaktsüsübaji liasü. Khristan ka asoshi pa temeimer agi sünger Tsüngrem den Pa mission nung malitsübaji tamakoktsü.

Pa temeimi sünga melira nai shinga dang Tsüngremi na yok ta kuli mesütetsü. Nai tangar dang tai metoktetsü aser talila mile moutetsü mesüra tangar asoshi tenla magütsütetsü. Item ajak inyaktetsü asoshi na mezüngbuba Tsüngrem temeim agi sünga alitsüla. Tebu aser Pa masadangtetba temeim bushiang; aji sür na ajanga tangar dang meimtsü Techir dang melaang.

## Myanmar nung Tenla kitem amakba US State Dept.-i aitsür

**November 21, 2021:** United States Department of State-i sangdong ka ajanga Myanmar kübok Chin State nung sepaitemi civilians amakba, kiojen aser Tenla kitem amakba sashia aitsüogo.

Chin state nung Myanmar sepaitemi meimchir temeden balala anema inyakba atema US-i tebilemtsü akar, ta kasa sangdong ajanga metetdaksü.

Tesüiba ita ishika tsünga Chin state nung sepaitemi ki 100 dak tema aser Tenla kitem raksatsüba osang kanga prokshiba sülen US State Dept-i item tatalokba aitsür.

US State Department-i, "Sepaitemi inyakba mapatemji ajanga parnoki Burma nüburtem taküm atema mebilemtsüba kuli sayur. US state Department-i iba linük

nungji meimchir temeden anema inyakba mapatem anentsü atema alima linüktem dang sepaitemi aitsütsü ayongzük," ta metetdaksü.

US state department-isa Sagaing aser Chin state na nung sepaitemi operation sashia aoba atema tebilemtsü akaba den külemi Myanmar nung rara anentsü, pua alirtem chioksü, democracy sorkar tentetsü aser yimjung alitsü atema ayongzük.

Taküm küm tetenzüklen Myanmar nung sepaitemi democracy lenirtem apuba sülen küm ka emergency sangdonga sepaitemi yimsüsüba ajanga iba linük nung Khristan million 4.4 shi timtemdar.

Tang Myanmar nung, talisa Chin state nung sepaitemi Tenla kitem aser Khristan kiojentem

kanga raksatsür. Myanmar sepaitem aser sepai yimsüsüba anema nokdakertem tsünga rara tesashiba akümba sülen sepaitem kanga takoksa angur, ibayongji sepaitem mangyanga Khristantem meyong Tenla ki aser kiojentem raksatsür.

Myanmar nung Buddhist nationalism kanga tashi itta lir aser ibaji ajanga Khristantem aser tanga tamangba yimsü den minority tem reshikangshir. Myanmar nung Buddhist yimsü amanger nütsüng timba lir, aser linük nung Khristantembo 'second class citizens' ama züngshir.

Coronavirus wara ajanga linük nung Khristan aika sensaktia nung aliba mapang ka nung tang sepaitemi yimsüsüba ajanga Khristantem timtem tali bendenlokogo.



ABBA teloki parnok indang 'Voyage' kensep nung Khristmas ken 'Little Things' CD sayatsü. Little Things video CD ya December 3, 2021 nü Universal Music ajanga sayatsü. Little Things ken ya tan ita tetenzüklen saya aser UK nung Voyage kensep ya tang album chart temaba jenjang nung lir. Iba dak alia tanga linük 11 nunga temaba jenjang nung lir.

## Will Plyler-i Khristmas kensep ka sayaogo

**November 21, 2021:** ni Goldsboro nung kü indang Entertainment Arts Music home studio nung record süa Production program, N.C. Wesleyan Wesleyan College nungi graduate asür, Will Plyler-i tang mezüng Khristmas kensep ka sayaogo.

Pa indang kensep tasenba "Once Upon a Silent Night" ya Hokolbar (November 18) nungi streaming platforms aika nung angur.

Iba kensep nung Khristmas original kentem keta lir aser item rongnung "Joy to the World," "Angels We Have Heard on High," aser "Go Tell It on the Mountain" densema ken tejen aika densema lir.

Iba CD alinertemi wpmusicofficial@gmail.com dangi email asütsü akok.

Tamalen Plyler-i, "Tan November ita nung kü indang mezüngbuba Khristmas kensep sayatsü ni yongyar. Item ken ya

produce asür. N.C. Wesleyan College nung bachelor's degree in music production agiba ajanga ni ken mejemtsü akokba den külemi aika angazüka liasü. Ni iba shisaliok bushiba ajanga ni ken mejemtsü mangdang yua aliba atangji nung ataloker," ta lemsatepa liasü.

Iba kensep nung pai drum dak alaka tanga kongki ajak atem. Drum ji par adianu, Bentley-i temja liasü. Plyler kinüngtsü, Kaitlyn aser Abby Patterson natia ken kar nung shilem agia lir.

N.C. Wesleyan College nungi graduate asüba sülen Plyler-i Mount Olive nung aliba The Bridge nung creative arts pastor inyaka liasü. Tang pa Triple-Knot Studios nunga tesayur inyaker.



2021 Khristmas mongpu atema Yisu Khrista asoba yimti- Bethlehem nung benjung sobütsü inoka aliba noksa nung angur.

**OLONG PAITEP # 6004**

1			2					3		
4							5			
						6				
			7							8
		9								
							10			
11						12				
13										

<b>TIPLÉN</b>		<b>LANGTSÜNGLEN</b>	
2. Teka mapa tajung	- (8)	1. Anepalua inyak	- (7)
4. Anakshinüba	- (5)	2. Teptsü	- (4)
5. Süoshi agi tazü	- (4)	3. Nok agi raratep	- (6)
9. Aria bilemtep	- (7)	6. Kibong aküm	- (4)
11. Ajemalu ozü	- (4)	7. Nüji masü	- (4)
12. Tzü an	- (5)	8. Taruba küm	- (7)
13. Teben teloktep	- (8)	9. Teka shidok	- (6)
		10. Meputep/Mapet	- (4)

**OLONG PAITEP # 6003 TELANGZÜBA**

<b>TIPLÉN :</b>		<b>LANGTSÜNGLEN :</b>	
1. Yimlibilem, 4. Anak, 5. Tangar,		1. Yongya, 2. Moko, 3. Marok,	
7. Aya, 8. Arong, 11. Par, 13. Lemjem,		5. Teronem, 6. Nung, 8. Amajok,	
14. Oagi, 15. Mulung.		9. Jangzü, 10. belem, 12. Rong.	



**KIBONG NUNG KINUNGBO PROBLEM :**

**Watsüla** : Aya atongtsü, nibo tanurtem masü ozü tambu khuret tuluba aja.

**Warakla** : Wa kechi koma khuret ka aji?

**Watsüla** : Ni sen-otsü ayu majung tambu yi ajemtsü ayarsa alir aja.

**Warakla** : Achha, pai laishiba azünger asü mazünger

**Watsüla** : Kodanga mazünger ati.

**Warakla** : Good, nai senji laishiba nungsa louka yuangma, ozü Alokba kasa problem liasüba tangbo khenyongi sen ayudak mangurji maoyateter ako.

**Watsüla** : Wao, brilliant idea, kanga pelar!

Lilir : WhatsApp

**TANÜBO NAI LANGZÜANG**

Q. Universal Service Obligation Fund (USOF) ya koba sector den sendaktepa lir?

[A] Coal Mining                      [B] Tele-communication

[C] Automobile                        [D] Textiles

(Taruba adok nung onoki langzüsü)


**YASHI ADOK TELANGZÜBA:** Dhaka

**AO OSHI ANGAZÜKDAK:**

**TANÜ ANGAZÜKTSÜBA OJANG**

**Lepshi**  
(v) kasa o tanaben ashi (repeat the same words)  
\*Yimteni Covid wara nungi kümzüka alitsüsa inyaksü **lepshia** metetdaksü.

**Lepshi**  
(v) nok agi ajak lepa aoba (cut down all by dao)  
\* Nokinketeri tsükchirtem ajak **lepshia** ao.



**NAI-A YA METETTER MA**



Huntsville, Alabama nungi Michael Pick-i 'Nerf N-Strike Elite Longshot CS-6' tuluka yanglutet. Iba Nerf gun tasazük metre 3.81 (süklep 12 ser inch 6) asütsü aser iba Nerf gun atema Michael-i record tasen ka ajangzüketet. Michael-i yangluba Nerf gun ya original Nerf gun dang nungi shilem 300% agi tuluba lir. Taoba mapang creator aser engineer Mark Rober-i Nerf gun (metre 1.82 - süklep 6) ka yanglua liasü aser tang Michael-i Mark indang record ajangtetter asütsü. Micheal ya space software engineer aser YouTube creator ka lir; aser pai computer-aided design (CAD) amshia iba Nerf gun yanglua liasü.

**SUDOKU # 6045                      TELANGZUBA # 6044**

		2	5	6		9	2	6	5	1	4	8	9	3	7		
4	9	7				5	1	7	8	9	5	6	3	2	1	4	
	5			9		3	8	3	1	4	9	7	2	6	5	8	
	1	3			2	9		1	9	3	4	5	7	8	6	2	
9		4		5		2	6	3	5	4	7	8	2	6	3	9	1
			7			8		4	8	2	6	3	9	1	7	4	5
	3	5		8	1	4			4	3	2	7	1	9	5	8	6
2			9			1	3	7	6	5	8	2	3	4	1	7	9
	6				4		8	2	9	7	1	6	8	5	4	2	3

**OJANG LUTEP # 5601**

GINTAÜRBO :

TIJEN :

KASA :

AKAJ :

AJZÜKTSANGÜ :

OSASHI :

RANMEGA :

AKINYER :

KAAI :

ALMI :

**OJANG LUTEP TELANGZÜBA # 5590**

SEMPET AJUNGBA KISÜNG MASÜ SAKA JAKLA DEN AJEMALUTSÜ KANGA NÜNGDAKER

**TAN HOPTA ATEMA - KOMA SÜLA ?**

Q. Asen lima nung 'Clean Election' indang ya kenyongi mejembi aser meinyak nunga koma süla ?

# VASECTOMY FORTNIGHT 21ST NOV - 04TH DEC 2021

**OMEN** "TEBURI FAMILY PLANNING AGIZÜKBA AJANGA KIBONG  
PELAALITSÜ ASOSHI TAMENDAKDAK YANGLUR"



## ANGATI AGIANG

**November 28 nungi December 04, 2021** tashi State  
ajunga nung Sorkar Mozüki tem nungi teküboklen  
agüja aliba nung Family Planning Services agiang-  
- Permanent Family Planning (Teti atema tanur  
magitsü) inyakyim (tebur atema Vasectomy aser  
tetsür atema Tubectomy)  
- Temporary Family Planning (Khenpiga atema  
tanur magitsü) inyakyim (Copper -T, Condom,  
Oral Contraceptive, PPIUCD, IUCD-380A & 375)

## SENOTSÜ TEYARI AGIZÜKANG

- Tubectomy atema sen 600/-
- PPIUCD atema sen 300/-
- PAIUCD atema sen 300/- aser
- Family Planning mapang Vasectomy atema sen 1100/-



Family planning sentong  
takok angutsü aser  
tetsürtem nem tashi  
agütsütsü asoshi teburtemi  
shilem agitsü kanga  
tongtipang



Nai aginüba ama  
tanurtem arur lira teti  
atema Family  
Planning agiang



Tanur ana tetsüngta  
peria alitsü asoshi  
khenpiga atema  
Family Planning  
Methods tem  
amshiang.

\*ALWAYS FOLLOW PRECAUTIONARY MEASURES  
OF- WEARING A MASK, WASHING HANDS FREQUENTLY  
AND MAINTAINING SOCIAL DISTANCE. DON'T GO OUT OF  
THE HOUSE UNNECESSARILY



DIAL STATE HELPLINE NO  
1800-345-0019 FOR ANY  
QUERIES ON COVID-19  
AND OTHER HEALTH ISSUES. DIAL  
102 FOR AMBULANCE SERVICE.

For more information visit  
your nearest Health Unit  
FOLLOW US  
@NagalandNhm  
nhmnagaland

## Sudan mitkari PM Hamdok tanaben anioktsü

**Khartoum, Yimpoksüi/Nov. 21 (Agencies):** Sudan mitkari tashiyim amshia sorkar atsüngdokba sülen atsüngdoker aliba Ato Kilonser Abdalla Hamdok tanaben anioktsü aser pua aliba civilian lenirtem chiochtsü, ta tetsüngtai ia jembitsürtemi ashi.

Umma Party tekolakba, Fadlallah Burma Nasir-i iba osang ya Deobarnü osangbener dang ashi. Sudan nunger tetsüngtai ia jembir telok katia iba tezüngzüktep indang sangdong ka nung shia liasü.

"Hamdok pa indang mendeni meyipa shilangtsü aser yimsüsürtem pua aliba chiochtsü atema General Burhan, Abdalla Hamdok, political forces aser civil society organisation tem tsüngta yimtenren tsütsü tezüngzüktep ka agiogo," ta Nasir-i ashi.

Hamdok-i technocrats indang cabinet temeja ka tentettsü aser pua aliba yimten yimsüsür ajunga chiochtsü asoshi mitkar aser political party tsüngta tezüngzüktep yanglu, ta Nasir-i ashi.

Honibarnü menur agiba senden nung pa shilem agi aser yangji iba tezüngzüktep ya renem, ta Nasir-i ashi.

Sovereign Council senden ka Deobarnü amentsü aser iba osang sangdongtsü, ta iba jembishinü meteta alir osang ka ajanga ashi.

General Abdel Fattah al-Burhan-i mitkar tashi amshia Sudan indang civilian-i yimsü asüba tsütsü melenzüka aoba sorkar atsüngdoker hopta asem dak tali lir iba tezüngzüktep ya agir alitsü.

Al-Burhan-i October 25 nü state of emergency sangdong, interim government anentsü aser civilian lenirtem apu, anungji linük balalai iba maparen

aia ola adok aser nübürtemi yimti-yimtong nung longkak aita aru.

Mitkari sorkar atsüngdokba mapang Hamdok ya kidang pua ayu. Iba mera ya agiba ajanga mitkar aser civilian teloktem lungjemer transitional sorkar tatem kati aru, shirnoki 2019 küm Tir Omar al-Bashir yimli laodakja liasü.

Yimten yimsüsür telok balala, taoba mapang sorkar atemba teloktem aser mitkar lenirtem tsüngta tezüngzüktep ka agiba sülen iba jenjang ya tongtet, ta tetsüngtai ia jembirtemi sangdong ka nung ashi.

"Meyongnem agütsüba sülen tanü tezüngzüktep ya yimjak nung sangdongtsü aser yimtenren tsütsü sangdong ka agütsütsü," ta ashi.

Mitkari tashiyim amshia sorkar atsüngdokba anema nokdakertemi nübürtem dang Deobarnü longkak aittsü sangdonger ghonda ishika lia iba mera ya agi.

Bodhbarnü ya tamajungtiba anogo liasü, kong nisung 16 takum sama. Mitkartemi sorkar atsüngdokba sülen nisung tepsetba ya 40 jungogo, ta doctor temi Honibarnü shia liasü. Nisung tepsetba indang bushisüngdangtsü, ta Sudan ketdangsürtemi ashi.

Longkak aita mapang aiben azüdokshia liasü, kong police aser sepaitemi injang aser tear gas amshia longkak aiterem aridok. Ketdangsürtemibo injang mamshi aser lokti azüoktsü atema tashi kanga ajema amshi, ta ashi.

Forces for the Declaration of Freedom and Change ajanga mitkartem den tezüngzüktep agiba nung tai pua liasü. Iba telok lenisüba kübok al-Bashir atsüngdoka liasü.

Deobarnü sangdong ka nung

parnoki mitkar den külemi yimtenren tasen anema nokdaker, ta ashi aser mitkar tashi amshia sorkar atsüngdoker obendangba bangdaki anir arutsüla, ta nenshia ashi.

Tarutsü nung mitkar shilem asoshi nübürtemi tasingdangba lir, ta Sudan yimtiba, Khartoum nungi osangbener kati ashi.

"Parnok aikati yimtenren tsütsü iba ama tejangja maliba tatem kati arudaktsüner ta ashir aser temelenshi kar aginer, saka linük yimtenren nung mitkar temi maneni shilem agiba anendaktsüner. Mitkartem parnok aliba tesemi meyipa odaktsüner aser civilian transition temeja aginer."

## Philippines-i China dang South China Sea nungi ainshitsü ashir

**Manila, Yimpoksüi/Nov. 21 (Agencies):** China nunger tzükum anüker indang rong aseme mangatetep aliba South China Sea nung Philippines indang exclusive economic zone (EEZ) nung linük indang rong ana nokdang aser tzü khaloktsü, ta Philippines-i ashi.

Foreign Minister Teodoro Locsin-i ashiba agi, iba ya November 16 nü Ayungin Shoal (Second Thomas Shoal) anasa atalok aser Philippines indang rong, koba anasa aliba mitkar nem chiyongtsü bener otsür liasü, iba rong ana ya mapa meinyakdaksü. Yiru-yipongba meliasü.

"Chinese coast guard rongtem mapa ya ozüng alema lir. Iba tesem nung aser temeket nung China-i ozüng amshitsü temeden mali. Parnoki angatetsüla aser meyipa aotsüla," ta Locsin-i sangdong ka nung ashiba Foreign Ministry ajanga social media nung prokshia liasü.

China-i 'nine-dash line' ta

Mitkari October 25 nü agiba mera ya tashiyim amshia sorkar atsüngdokba masü saka civilian nem yimsü südaktsütsü asoshi inyaktepba nung jangjashiba ka lir, kechiaser sorkar kübok civilian aser mitkar tsüngta telemsa tali adok, ta mitkar tekolakba al-Burhan-i ashi.

Ita tetenzükken pai civilian-military ruling council tasen ka sangdonga liasü, kong pa tekolakba liasü aser tashi tulu aliba paramilitary commander den mitkar tanishir asem, taoba mapang sorkar anemer nisung asem aser civilian ka shimoka liasü.

Hamdok ya ato kilonser ka ama tanaben shimoba sülen telemtetba balala agiba nung pa

tashi kodaka alitsü ta bilemer, ta osangbeneri ashi.

"Pai shimtetba cabinet minister ajunga Sovereign Council ajanga agizüktsüla, koba mitkar lenir General al-Burhan kübok lir. Anungji cabinet shimba nung pa tashi kodaka alitsüar mejanga," ta ashi.

Sudan nung yimten yimsüsüba melenba nung yaritepba anüolen linüktemi mitkar maparen aitsü aser Sudan nung senotsü teyari dollar million aika agitsü aliba soita ayu.

United Nations aser Africa nung lokti tentet balala atema inyaksang Hamdok nem tanaben yimsüsüba tashi agüjang, ta linük balalai takhangba agüja liasü.

nungja agütsüba nung ajemdaker South China Sea ajunga nung kibur akumer, koba küm pungo tejakdang international court ajanga aija liasü.

Iba obendang ya Beijing-i senzüka yutsür aser artificial island tem yanglua tzüyim sepa, tzükum anüker aser angu apuba rong tem mangatetep aliba tzüyim leni yoker, koba Philippines, Malaysia, Vietnam, Brunei aser Taiwan-ia par meyong ta kibur kuma jembir.

China-i taremsük aser atsü-anem makar aser iba tatalokba atema Manila jashiba, aitsüba aser longkak aita indang Chinese ambassador nem osang agütsüogo, ta Locsin-i ashi.

China den tesendaktep tajungba yanglutsü merangsang, Tir Rodrigo Duterte-i linük indang South China Sea inyaksangshi nung mera tesashiba ka magiba atema aija arur. Brehostibarnü pai foreign affairs ministry ajanga kanga

kera telanzüba agütsüba atema bukuma jembia liasü.

"Asenoki maneni asen litsülika nung asen tashi, temeden amshia wazüka ayutsü," ta tir atema odongtar Karlo Nograles-i sangdong ka nung ashi.

Ayungin Shoal ya Spratly Islands nung shilem ka lir, koba dang Philippines nung Kalayaan Islands ta ajar. Ibai Philippines EEZ kübok lir, koba par tzükum nungi kilometre 370 (200 nautical miles) atsülanga aor.

EEZ kübok alina Palawan Island anüolen tsütsü kilometre 320 (175 nautical miles) shi orr aliba Whitsun Reef nung China indang 'maritime militia' nungi rong ter dak tema hopta aika arua amungba atema küm tetenzükken Philippines-i ashishia liasü.

2012 küm China-i tashiyim agi Scarborough Shoal amokbang, koba Philippines indang Luzon asetkong nungi anüolen kilometre 229 (124 nautical miles) shi pilar lir.

### Rajasthan nung cabinet ulushia minister 15-i tenangzükba agi



November 21, 2021 nü Raj Bhavan, Jaipur nung minister tem tenangzükba agiba sülen Rajasthan Chief Minister, Ashok Ghelot aser Rajasthan Angh, Kalraj Mishra nati Cabinet Minister tasenpurtem den tangokba noksa nung angur.

**Jaipur, November 21 (Agencies):** Amongnü Raj Bhavan, Jaipur nung Congress MLA 15-i minister tenangzükba agiogo, parnok rongnung yaküm cabinet nungi anentsüba lenir ana densema lir. Party anema nokdakba atema yaküm Vishvendra Singh aser Ramesh Meena na minister menden nungi anendakja liasü saka tenaprong tanaben cabinet nung aniokogo. Rajasthan State Angh, Kalraj Mishra-i ketdangüsü minister tasenpurtem tenangzükba

agidaktsü, aser iba sentong nungji chief minister, Ashok Gehlot, council of ministers aser sorkar tongti ketdangsertem aika aden. Cabinet minister 11 rongnung asem- Mamta Bhupesh, Bhajan Lal Jatav aser Tikaram Jully nung minister of state (MoS) nungi cabinet-i aniokba densema lir. Hemaram Choudhary, Mahendrajeet Singh Malviya, Ramlal Jat, Mahesh Joshi, Govindram Meghwal aser Shakuntla Rawat nungeria

cabinet ministers tenangzükba agi aser Zahida, Brijendra Singh Ola, Rajendra Gudha den Murari Lal Meena nungeri Minister of State (MoS) tenangzükba agia liasü. Tang Rajasthan nung council of ministers nung chief minister dak alia cabinet minister 19 aser Minister of State 10 kümogo. State nung council of ministers 30 jungogo. Rajasthan Cabinet nung minister densema minister timba agia 30 dang asütsüla.

### Nov. 24 nü Union Cabinet-i aluyimba ozüing asem agientsüa akok

**New Delhi, November 21 (Agencies):** Aluyimba ozüing tasen asem agientsü atema Bodhbarnü Union Cabinet-i telemtetba agitsü aser November 29 nü asükwa mongpu Parliament tenzükba sülen item bill ji agientsü atema Parliament nunga benoktsü. Aluyimba ozüing tasen asem agientsü, ta sorkari sangdongaka aluyimertemi tanüingba onüktem mebenetet tashi maneni longkak aittsü telemtetba agiogo. Aluyimertemisa taruba anogo ishika tsüingda jelia ayongzükba aliba sentongtem agitsü telemtetba agiogo. Amongnü aluyimer unions-i tentetba Samyukta Kisan Morcha (SKM) senden Delhi arrtsülen Singhu arrtsü anasa amen aser iba senden nung aluyimertemi Hombarnü (November 22) Lucknow nung

ayongzükba aliba ama 'mahapanchayat' sentong agitsü lemtet. November 26 nüa aluyimertem Delhi arrtsülen longkak aitba tesemtem nung adenshitsu aser November 29 nü tractor rally agia Parliament tashi aotsü. Senden tembangba sülen osangbenertem den jembidang SKM lenir, Balbit Singh Rajewal-i, parnoki yimjak nung Ato kilonser, Narendra Modi dangi shidi ka zülua takhangba kar agütsütsü, ta metetdaksü. Takhangba onüktem rongnung MSP committee tentettsü, aluyimertem anema benoka aliba ken otem agientsü, Electricity Bill 2020 agientsü aser longkak aitba mapang nung asürtem kinüngertem nem senotsü teyari agütsütsü densema lir. November 27 nüa SKM

senden amentsü aser tang tensa apir aluyimertemi telemtetba kar agitsü, ta Balbit Singh Rajewal-isa metetdaksü. Hokolbarnü Ato kilonseri, sorkari aluyimba ozüing tasen asemprong agientsü atema telemtetba agiogo, ta sangdonga liasü. Ato kilonseri iba osang sangdongba sülen aluyimertemi, item ozüing Parliament nung magien tashi parnoki longkak aittsü, iba denji külemi aluyimertemi MSP densema sorkar dang akhangba onük ajak ataloktsütsüla, ta metetdaksü. Yaküm November 26 nungi tenzükba aluyimertem Delhi arrtsülen adenshia aluyimba ozüing asem anema longkak aitba sülen küm ka ajungtsü anogo ishika dang lir, aser iba mapang nungji longkak aiter aluyimer 700 jungnüa süogo.

### Rahul Gandhi-i arrtsü security indang kecha memetet: Kiren Rijiju

**Agra, November 21 (Agencies):** Amongnü Law & Justice Union Minister, Kiren Rijiju-i, Rahul Gandhi-i arrtsü security indang kecha memetet, anungji pai asüingdangbatem langzükba ajanga linük security jenjang ang raksatsü, ta metetdaksü. Agra nung osangbenertem den jembidang Rijiju-i, "Iba onük ya kanga tulu. Rahul Gandhi-i arrtsülen security aser tanga onüktem indang memetet. Rahul Gandhi-i asüingdangbatemji onoki langzükba ibaji linük atema majung asütsü. Rahul Gandhi-i jembiba o nungji tetezü mali, anungji pai jembiba oji mezüingshitsüla," ta ashi. China-i Arunachal Pradesh arrtsülen kiojentem yanglur, ta osang prokba nung ajemdaker Congress lenir Rahul Gandhi-i Centre sorkar kanga aitsüdar. "Gandhi-i asüingdangbatem

atema sorkari telangzükba agütsü tenzükra sorkari mapa meinyaktettsü. Onoki linük atema inyaksü nüngdaker," ta paisa ashi. Aluyimba ozüing asem agientsü atema sorkari telemtetba agiba dak sendakba nung pai, iba onük nungji tali jembitsü menüingdak, kechiyong Ato kilonser, Narendra Modi-i kanga tongtibang telemtetba ka agiadokogo, ta ashi. 'Sansad Khel Spardha' kübok marathon sentong 'Run for Greenery' tenzüktsütsü atema Rijiju-i Agra semdanga liasü. Amongnü anepdang pai Agra College Sports ground nungi marathon tenzükja liasü aser iba sentong nung kaketshirtem, NCC cadets, scout guides, saisapongertem, melungtet telok balala nung inyakertem aser Agra nung alir nisung noklang aikati shilem agia liasü.



Haridwar, November 21, 2021: Sangküm küm tetenzüklen Uttarakhand Legislative Assembly Elections agitsü lia Amongnü Haridwar nung Delhi Chief Minister aser AAP tongti lenir, Arvind Kejriwal-i osangbenertem senden ka nung jembiba noksa nung angur.

### India nung ano Covid agi nisung 313 asü

**New Delhi, Yimpoksüi/ November 21 (Agencies):** India nung ano nisung 10,488 dak coronavirus tashidak putetogo aser iba tashidak agi ano nisung 313 süogo, ta Amongnü ministry of health & family welfare-i metetdaksü. Tesüiba ghonda 24 tsüingda coronavirus agi shiranger 12,329 anepogo aser tang tashi nung linük nung iba tashidak agi shiranger ajak senteperbo 3,39,22,037 anepogo. Tang India nung coronavirus agi

teshirangdakpur 1,22,714 dang kümogo aser ibaji tesüiba anogo 532 tsüingda teshirangdakpur ishitiba lir. Tesüiba ghonda 24 tsüingda samples 10,74,099 tendangogo, aser tang tashi nung samples ajak senteper 63,16,49,378 tendangogo, ta Amongnü Indian Council of Medical Research (ICMR)-i metetdaksü. Nationwide Vaccination Drive kübok tang tashi nung coronavirus vaccine dose crore 116.50 agütsüoogo, ta Health Ministry-isa metetdaksü.

### Kari asen li rakzüktsü merangra odangbo metoktsütsü: Rajnath Pithoragarh, November 21

**(Agencies):** Union Defence minister, Rajnath Singh-i, India-i kidanger linüktem den tesendaktep tajung yuner, saka linük kari danga asen li inch ka danga rakzüktsü merangra India-i odangbo metoktsütsü, ta metetdaksü. Pithoragarh nung osangbenertem den jembidang pai, "India-i kodanga tanga linük mamak mesüra bendanger li merakzük. Kidangertem den tesendaktep tajung ayubaji India nung sobaliba, saka kari ibaji mangateter," ta metetdaksü.

Pakistan linüki kiralongra ajanga India tashi meitdaksütsü maneni meranger, anungji parnok nem osang tejangja metetdaksüoogo, ta pai ashi. "Onoki anüolen asen kidanger (Pakistan) dang, nenoki ambangyima inyakra onoki arrtsülen dang masü saka linük tesem ajak amaktsü ta metetdaksüoogo," ta pai ashi. Pai Pakistan tenüing tetshia item o jembi saka China tenüingbo metetshii pai, "Ano asen kidanger linük ka (China) lir, aser parnokia ibaji mangatetter ama ni bilemer," ta ashi.



Mumbai, November 21, 2021: Indian Ocean Region nung raradang amshitsü atema yangluba rong- 'Visakhapatnam INS' Amongnü Mumbai nung semzükba sülen tangokba noksa nung angur.



## Kangana indang 'Dhaakad' sangküm April 8 nü sayatsü



**Mumbai, Yimpoksüi/ November 21, 2021 (Agencies):** Maharashtra nung theatre tem yakta lapoktsü asoshi maparen achaayangba mapang ka nung, Bollywood star Kangana Ranaut indang taruba action film 'Dhaakad' ya sangküm April 8, 2022 nung sayatsü ta sangdongogo.

Mezüngbo iba film October 1, 2021 nung sayatsü bilema liasü, saka film yanglurtemi sangküm ang sayatsü anogo atsulangogo. Sen jenti indoka yangluba film ya Razneesh Razy Ghai-i direct süogo aser Deepak

nükdabangdaba maparen inyakdaksüba aser tanurtem shibelenba maparen nokdangtsü atema lai inyaker.

Iba film ya Bhopal, Budapest aser Mumbai yimti tem nung lemsar tangoka liasü.

Project tasen indang jembiba mapang, Kangana-i, "Dhaakad ya screen (theatre) tulu nung aikati sapua repringba otsü ama ka asütsü. Iba otsü ajanga tawa tanü tesem balala nung atalokba indang jembir aser nübur dang screen ajanga item otsü sayatsü. Iba otsü ajanga nübur mulungjang nung

Mukut o Sohel tejbiba ka aittsü aser Maklai na tongtibangsa iba film ajanga producer ama board ajunga nung tetsür den inyakogo. jembitsü imlar. Sangküm April

Iba spy 8 nü audience aser Agent Agni thriller nung, ajuruteptsü asoshi Kangana dak yongyaseter," ta ashi.

alaka Arjun Director Ghai-i, "Tanga Rampal aser movie dang nungi Dhaakad ya Divya Dutta na alakteta yangluogo aser iba den nüngtugu movie kü mulung nung teti actor kari alitsü. Team ka ama, ajak tongti shilem ajangzüksü asoshi onoki agir. tajungtiba inyakner.

Dhaakad International action film den nung Ranaut-i medemdanga aser iba jenjang Agent Agni meneptsü nükjidong yur ama shilem Dhaakad yanglua liasü. Iba agir, kong project inyak tenzüker nungi tetsürtem tatem tashi producer temi tashiyim agi kanga nungitta yariogo. Iba azüapongba/ film yanglutsü tayongzükba tuluka liasü. Audience dang Agni otsü sayatsü asoshi yongyar," ta shisem.

Maneni, iba film indang stunt atema international team teyari agiogo. Kasa mapang, Japan nung award takok angur aser cinematographer takotet Tetsuo Nagata, shibai Hollywood action film aika nung inyakogo, camera maparen tsütsü pai achaayanga liasü.

'Dhaakad' ya Soham Rockstar Entertainment Pvt Ltd den Kamal Mukut, Sohel Maklai Productions aser Asylum films longjemer sayatsü sentong lir.

## MULUNGNEN O



ASO :  
07th April 1971

ASÜ :  
16th Nov 2021

Onoki meima aliba obala Zungasanen (Longsa) shiranga aliba mapang nungi pa iba akümüli tembang tashi nung, ana aser talang nungi ozü meimertem shirnokisa tamang sarasadem den nübu, rongsen aser shisatsü agi yaritepa aruogo, onoki nenok mapa tajung kodanga mamatsü. Nenok temeim mapa tajung asoshi asen Tsüngremi nenok kibong aser kija taküm ajak moajangma ta ozü tamang sarasadem.

Talisa item lokti aser kija dang kanga pelaba lemsateper:-

1. Longsa Senso Telongjem, Dimapur.
2. Longsa Senso Telongjem, Kohima.
3. Mokokchung Town Longsa Senso Telongjem.
4. Olive hospital Doctor aser nursing staff, talisa, Dr. Bendangtoshi, Dr. Ikhitto aser Dr. Biogese.
5. Artang Baptist Arogo aser Artang Yimten.
6. Lirmen Baptist Arogo.
7. Govt. Middle School, Artang.
8. Col. Wati Jamir, Commandant 17 Assam Regiment.

Temeim Kinungtsü, Chirnur aser Kinungertem.

## Form No. INC-26

{Pursuant to rule 30 of the Companies (Incorporation) Rules, 2014}

BEFORE THE CENTRAL GOVERNMENT,  
REGIONAL DIRECTOR, NORTH EASTERN REGION, GUWAHATI  
(ASSAM)

Companies Act, 2013 indang sub section(4) of Section 13 aser Companies (Incorporation) Rules, 2014 indang Rule 30 clause (a) of sub rule (5) dak sendakba

ASER

ANAND BHAWAN, GURUDWARA ROAD, DIMAPUR, NAGALAND, NL-797112 nung registered office GOPI DEHYDRATES PRIVATE LIMITED (CIN: U15132NL2000PTC006110) dak sendakba nung

.....Applicant Company/Petitioner dang company indang Registered office "State of Nagaland" nungi "National Capital Territory of Delhi" agi melentsü asoshi November 13, 2021 nü Extra Ordinary General Meeting nung bangjemtep dak sendakba nung iba Company indang Memorandum of Association melenba jangjashitsü atema Companies Act, 2013 indang section 13 kübok company-i Centre Sorkar dangi application ya yoktsü asalentong yangludlar ta nüburtem dang metetdaksür.

Iba company indang registered office melenshitsu asalentong ajanga nisung kar danga timem adoktsüsa kümra investor complaint form ajanga MCA-21 portal ([www.mca.gov.in](http://www.mca.gov.in)) nung mesüra registered post ajanga la/pa tebilemba den affidavit nung tashishibatem zülur iba osang sangdongba anogo nungi tenzüka anogo 14 tsungda Regional Director, North Eastern Region, 5th Floor, Prithvi Planet, Behind Hanuman Mandir, Ulubari, G.S. Road, Guwahati -781007, Assam dangi teküboklen agüja aliba address nung agütsütsü akok:-

ANAND BHAWAN, GURUDWARA ROAD,  
DIMAPUR, NAGALAND, NL-797112

For and on behalf of Applicant  
GOPI DEHYDRATES PRIVATE LIMITED

Sd/-

Date : 22.11.2021  
Place : Dimapur

ASHOK ANAND (Director)  
DIN: 00743268

## PUBLIC NOTICE

The National Human Rights Commission has decided to hold a public hearing on grievances of the general public regarding alleged violations of human rights in the States of Assam, Arunachal Pradesh, Nagaland, Manipur and Sikkim from **16th to 17th December, 2021** at Guwahati. Those persons who have a complaint of alleged violations of human rights by a public servant or of negligence by a public servant in prevention of such violation may send their complaints to the Commission by Registered Post/Speed Post at the following address or through email at [jrlawnhrc@nic.in](mailto:jrlawnhrc@nic.in).

Registrar,  
National Human Rights Commission,  
Manav Adhikar Bhawan, Block C,  
GPO Complex, INA, New Delhi-110023.

Complaints can be submitted using NHRC portal ([hrcnet.nic.in](http://hrcnet.nic.in)) directly or through the nearest Common Service Centre.

The complainants must invariably mention their mobile numbers/e-mail id etc. in the complaint for facilitating communication with them.

**Last Date for receipt of Complaints in NHRC : 27.11.2021.**

Such complaints as are deemed fit for enquiry shall be taken up at the open public hearings. The parties shall be informed in due course about the date and venue of public hearing.

Sd/- S. R. SARAVANAN, IPS,  
Special Secretary Home.

Issued by DIPR

## ALI AYOKER

Nuiland matong dang Foothill touch nung Ali tayoktsü lir. 100x100 nung Rs. 300,000/- (Rupees Three Lace) only. Joko plot ishika dang anünga lir. First come First.

CONTACT : 7308070002

EASTERN ART COUNCIL WITH SUPPORT FROM  
DEPARTMENT OF INFORMATION & PUBLIC RELATIONS AND  
TOURISM DEPARTMENT, GOVERNMENT OF NAGALAND PRESENTS

**HiP**fest

HORNBILL INTERNATIONAL PHOTO FEST  
HERITAGE VILLAGE, KISAMA  
1st - 10th DECEMBER 2021 •• 10:30AM - 4:00PM



PHOTO CONTEST THEME

COLOURS of NAGALAND

PRIZES: 1ST ₹25,000 | 2ND ₹20,000 | 3RD ₹15,000

AND 10 CONSOLATION PRIZES OF ₹5,000 EACH

LAST DATE OF ENTRY 25th NOVEMBER, 2021

MAIL YOUR ENTRIES TO : [hipfestnagaland@gmail.com](mailto:hipfestnagaland@gmail.com)

FOR MORE DETAILS : +919436005669 | +918837262093

FOR MORE INFO, RULES & REGULATIONS

<https://www.facebook.com/hornbillinternationalphotofest/>

PHOTO EXHIBITION | ART GALLERY | SALE & COFFEE HOUSE

## Manchester United-i Solskjaer mapa nungi anentsüogo



**Manchester, Yimpoksüi/Novemeber 21 (Agencies):** Manchester United-i Deobarnü manager Ole Gunnar Solskjaer mapa nungi anentsüogo. Honibarnü Watford goal 4-1 lagi makokba sülen pa mapa nungi anentsü.

Taoba mapang United asayar Michael Carrick, shiba Solskjaer indang coaching staff ka liasü, pa lenisüba nung Mongolbarnü United pur Champions League nung Villarreal den asayatsü. Club sangdong ka ajanga ashiba agi, season tembanga team anitsü atema interim manager ka shimtsü.

Solskjaer den 2024 küm July

ita tashi tenangzüktepa yanglur liasü, saka United pur taoba league asaya tenet nungi pongu nung tamakok anguba sülen pa mapa nungi anentsüogo. United puri Aston Villa, Leicester City, Liverpool aser Manchester City makok.

"Ole Gunnar Solskjaer-i manager mapa toktsüba Manchester United-i sangdonger. Ole ya Manchester United nung teti legend ka asütsü aser iba telemtetba agiba atema sasaa bilemer," ta United-i ashi.

Alex Ferguson-i 2013 küm mapa toktsüba sülen United-i tang tashi nung Premier League ka danga koka mali.

Club-i Portuguese forward Cristiano Ronaldo August ita alizük, saka season junga asayaa tenzükba sülen parnok tang jenjang tenetbuba nung lir aser temaba jenjang nung aliba Chelsea team dang nungi point 12 agi tajemba lir.

Solskjaer-i 2018 küm December ita Jose Mourinho ket nungi interim basis nung coach mapa agizük, saka asaya 19 nung 14 tashi koka team aniba sülen 2019 küm March ita pa coach asütsü shim.

Pa lenisüba nung United pur mezüngbuba küm jenjang asembuba nung tembang ajisüaka taküm parnok jenjang kanga mejungi lir.

October 16 nü Leicester City goal 4-2 agi makokba sülen Liverpool goal 5-0 agi aser Tottenham Hotspur goal 3-0 agi makokba sülen club asüngsashitsü nungdakba lemsatet tenzük aser taoba asaya ana junga masayatetba sülen Solskjaer mapa nungi anentsüogo.

United coach mapa abentsü atema taoba Real Madrid coach aser France midfielder Zinedine Zidane asandangdar.

## Deepak Chahar, Ishan Kishan to join India A for red ball series

**Yimpoksüi/November 21, 2021 (Agencies):** Fast bowler Deepak Chahar aser batter Ishan Kishan na South Africa den red ball four-day Test matches asem asayatsü aliba India A team nung züngoksemogo. Deepak aser Ishan na tang New Zealand den asayaa aliba T20 team nung züngoksema lir.

"Auh Deepak aser Ishan na squad nung züngoksemogo. Parnok Kolkata nung asaya tembangba sülen South Africa-i mao tsüngda A team den longjemtsü," ta BCCI ketdangsür kati PTI dang ashi.

A team atema Chetan Sharma-i aniba committee-i Railways indang wickekeeper Upendra Yadav dang shimba

sülen Ishan shimok ta angatetter.

"Team nung keeper tanabuba nungdaker aser iba mapa atema Ishan dang nungi shiba tajungba ali. Pa tangbo first keeper akümstsü," ta tanga ketdangsür kati ashi.

Deepak red ball agi aibenbo asaya mali, ajisüak pai ball swing süa onteter anungji selector temi pa team nung anioka mazüngi toktsüner.

Gujarat top-order batter Priyank Panchal lenisüba nung India A team South Africa nung oa asayatsü. Iba asayamung ya November 23 nü nungi tenzüksü. Iba tour nung anogo pezü asayaba Test asaya asem asayatsü. Asaya ajak Bloemfontein nung dang asayatsü.

## ICC-i permanent CEO asütsü Geoff Allardice shimogo



**Dubai, Yimpoksüi/November 21 (Agencies):** International Cricket Council permanent CEO asütsü Australia nung first-class cricketer ka aser administrator ka liasü. Pai ICC General Manager, Cricket mapa küm ti tashi benogo. Pai Cricket Australia nunga kasa mapa ya bena liasü.

"Geoff-i, ICC CEO mapa permanent basis nung abentsü atema mulunga agizükba atema ni kanga pelar," ta ICC mendenbuba Greg Barclay-i ashi.

"Tensa kanga majungba mapang pai lenisütsü sempet tajung aliba sayua ICC Men's T20 World Cup 2021 takok nung tembangogo.

"Geoff-i global cricket aser stakeholders kanga junga meteta lir aser onük züngsemtem den iba asaya ajungketsü atema inyaktsü asoshi pa tetemsü ta aiben kuli agütsüogo," ta Greg-isa ashi.

Külem tenzükertem den yimympong shidak mebeshiba atema Sawhney anema ken o benokba sülen pa nem March ita leave agütsü. Iba sülen July ita pai mapa toktsü.

Allardice ya taoba mapang

## ATP Finals: Zverev-i Novak Djokovic tsükdaktsüogo

**Turin, Yimpoksüi/November 21 (Agencies):** Alexander Zverev-i Honibarnü ATP Finals semifinal nung 7-6(4), 4-6, 6-3 agi world number one Novak Djokovic kokogo aser final nung pa Daniil Medvedev den asayatsü.

Mezüngbuba set ana tenapronglai kaka akokba sülen tasembuba set nung Djokovic-i aibelen aika mena tenzük aser Zverev nem pa indang serve rakzükdakja 3-1 agi Zverev tejakdang aküm.

Asaya ana sülen arishi küm 24 tain German nung asayar ya tera meyilongi aküm aser iba maongka agi Djokovic-i pa indang serve break asü.

Ajisüaka Zverev-i asendenshir kanga junga asaya tenzük aser asaya 6-3 agi akok.

Iba asaya makokba ajanga Djokovic ATP Finals trokbuba koka Roger Federer den kasa akümstsü aliba maongka agintsüogo. Zverev-ia iba asayamung 2018 küm koka lir.

Kasa mapang nung defending champion Medvedev-i semifinal tanga ka nung Norway nung asayar Casper Ruud 6-4, 6-2 agi kokogo.

Medvedev-i asaya kanga tashi ita tenzük aser Ruud indang serve break süa 2-1 agi pa tejakdang aküm aser maneni asaya amokbanger asayaa pai

mezüngbuba set akok.

Tanabuba set nunga Medvedev-i tajungba asaya aser 4-2 agi pa tejakdang akümbsa sülen asaya ayong ayonga akok. Pai winners 17 yoktet aser unforced errors 14 dang menaa liasü.

Iba asayamung round-robin stage nunga Medvedev asaya ka nunga danga tamakok mangu. Pai Hubert Hurkacz, Zverev aser Jannik Sinner akokba sülen semi nung Ruud tsükdaktsüogo.

Medvedev aser Zverev na tang tashi nung 11 ben asayaa lir aser Medvedev-i trokben aser Zverev-i ponguben ta koka lir.

## T20I cricket nung Martin Guptill-i alizüng tasenka tongtet

**Ranchi, Yimpoksüi/November 21, 2021 (Agencies):** Hokolbarnü, JSCA International Stadium Complex, Ranchi nung India aser New Zealand tsüngda '3-match T20I series' indang tanabuba match asaya mapang, New Zealand opener Martin Guptill-i otsüsüsüsa Virat Kohli indang record ajangteta T20 Internationals nung run timba yangluogo.

Kohli, shiba T20 World Cup nung India team tamakok ngur sülen T20I captain mapa toktsü, tang asaya aliba T20I series nung pai shilem magir.

Ranchi nung India aser New Zealand na tanabuba T20I

masayadang, iba alizüng tongtettsü asoshi Guptill-i run 11 nungdaka liasü aser par team pur mezüng innings - over 3buba nung pai iba alizüng tongtet.

Guptill-i ball asem nung iba alizüng tongtet, kong Bhuvneshwar Kumar over nung pai 4' ana zükloksü. Toss koka, Rohit Sharma-i fielding asütsü shim.

Guptill-i run 8 yanglur alidang tiaka pai züketa yokba ball ali matongdang KL Rahul-i pupet. T20I nung asaya tenzükür külen nungi Guptill-i century 2 aser half-century 19 yanglua lir. Tang, Guptill sülen, Kohli asaya 95 nungi half century 29 densema 'average 52.04' nung

run 3227 yanglua lir. Kohli sülen, T20I nung run timba yanglur rongnung külem team pur aser T20I captain tasen Rohit Sharma tasembuba asütsü.

Rohit Sharma-i run 3086 yanglua lir. Rohit, shiba T20Is century 4 tashi yanglua lir, 2018 küm nungi pai iba format nung century khen danga yanglua mali.

T20Is nung run 50 dak tema yanglur batter rongnung Kohli aser Rohit (29 aser 28) na asütsü. Australia indang limited-overs captain Aaron Finch (2608 runs) aser Ireland indang Paul Stirling (2570 runs) na jenjang pezübuba aser pungobuba nung lir.

## BILEMDANGANG

"O-bo khen jebizüka yokra meyipa magiteter."